

# 通鑑綱目

八之上

漢平帝  
孺子嬰

漢平帝

漢平帝  
新莽


東 京 圖 書 館				
漢書門	正史類	別子函	架五	冊九
			號八	冊七

漢書門				
類	號	函	架	冊
	五	一	五	九
	六	三	一	七
	七	七	七	七

內閣文庫	
三函	五架
一九	九七
九	七

內閣文庫	
番號	漢 5967
冊數	97(14)
函號	283 35

十五



糊などで貼り付けられている部分がめくれない箇所あり  
綴じ部(喉部分)の文字など開きが不鮮明な箇所あり



資治通鑑綱目卷之八

淺草文庫

起癸亥漢平帝元始三年。凡二十四年。盡丙戌漢光武帝建武二年。

癸亥元始三年考異按前已書元始元年此元始二字羨春聘安漢

公莽女為皇后

莽欲以女配帝以固其權奏言長秋宮未建掖庭媵未充請考論五經定取后禮正十二女之義以廣繼嗣博采二王後及周公孔子世列侯在長安者適子女事下有司上眾女名王氏女多在選中莽恐其與已女爭即上言子材下不宜與眾女並采太后詔王氏朕

資治通鑑綱目卷之八



外家其勿采庶民諸生郎吏守闕上書公卿大夫伏菴戶下咸言願得公女以為天下母

太后集覽長秋宮索隱曰皇后宮名長秋者從之秋陰之始取其長而欲其久正十

二女之義以廣繼嗣荀爽曰天子取十二女天之數也春秋成八年衛人來媵注魯將嫁

伯姬於宋故同姓來媵禮也九年晉人來媵左傳曰禮也十年齊人來媵公羊傳曰三國

來媵非禮也何休學云諸侯一娶九女唯天子娶十二女解云此保乾圖文孔子為後王

非古禮也廣繼嗣說注見成帝建始二年姊姪

**書法**立后書氏恒也書安漢公莽女何權所在也故權在於光則書立大將軍

光女權在於莽則書聘安漢公莽女權也一轍也然則霍后止書立此則曷為書聘

厚聘也終綱目書立某女為皇后二而書聘者一而已矣

### 夏安漢公莽奏定制度

莽奏吏民車服田宅器械喪祭嫁娶奴婢品制立宮稷郡國縣鄉皆置學官

**書法**於是郡國縣鄉皆置學官不書削之也

安漢公莽殺其子宇滅中山孝王后家殺敬武

公主及汜鄉侯何武故司隸鮑宣等數百人



莽長子宇非莽隔絕衛氏私與衛寶通書教  
衛后上書謝恩因陳丁傳舊惡冀得至京師  
莽白褒賞中山孝王后益湯沐邑七千戶宇  
復教令上書求至京師莽不聽宇與師吳章  
及婦兄呂寬議章以為莽好鬼神可為變恠  
以驚懼之因從類說令歸政衛氏宇即使寬  
夜持血灑莽第門吏發覺之莽執宇送獄飲  
藥死盡滅衛氏支屬唯衛后在吳章要斬初  
章為當世名儒教授千餘人莽以為惡人黨  
皆當禁錮不得仕宦門人盡更名他師平陵  
云敞時為大司徒掾自刻吳章弟子收抱章  
尸歸棺斂葬之莽因是獄窮治黨與連引素  
所惡者悉誅之元帝女弟敬武長公主素非  
議莽紅陽侯立莽尊屬平阿侯仁素剛直皆

以太皇太后詔迫令自殺郡國豪傑及漢忠  
直臣不附莽者何武鮑宣及王商辛慶忌諸  
子皆坐死凡數百人海內震焉北海逢萌謂  
友人曰三綱絕矣不去禍將及人即解冠挂  
東都城門歸將家集覽丁傳丁姬傳太后推  
屬浮海客於遼東類說令說輸芮反令  
平聲推原其比類而質實鮑宣渤海高城人  
說誘之令其歸政逢萌北海都昌人

**書法** 辭繁不殺而莽之惡著矣故宇  
雖飲藥死書殺而鮑宣書故官

**甲子** 四年春正月郊祀高祖以配天宗祀孝文以

配上帝考異祖當作帝 ○改殷紹嘉公曰宋公周承

通鑑綱目卷八

漢紀四十四

三



通鑑紀事本末卷八十一 漢書卷八十一

休公曰鄭公質實

承休縣名注見元帝初元五年

○二月遣大

司徒宮等迎皇后入未央宮

**書法**

書迎入未央宮何莽伉也故皇后未有書聘者至莽女則書聘皇后未有

書迎者至莽女則書迎終綱自皇后書迎者一而已矣

○遣太僕王暉等八人行天下觀風俗○加安

漢公莽號宰衡

初陳崇張竦奏稱莽功德以為宜恢國如周公至是太保舜等及吏民上書者八千餘人

復請如崇言章下有司請益封公以新  
息召陵二縣及黃郵聚新野田采伊尹周公  
稱號加公為宰衡位上三公言事稱敢言  
之賜公太夫人號功顯君封子男二人為侯  
加后聘合為一萬萬以明大禮莽稽首辭讓  
不聽及起視事止減召陵黃郵新野之田復  
以所益納徵錢千萬遺太后左右奉共養者  
莽雖專權然所以誑耀媚事太后下至旁側  
長御方故萬端賂遺以千萬數知太后厭居  
深宮中乃令太后四時車駕巡狩四郊存見  
孤寡貞婦賜民錢帛牛酒歲以為常太保舜  
奏言天下聞公不受千乘之士辭萬金之幣  
莫不鄉化蜀郡男子路建等輟訟慚忤而退  
雖文王郤虞芮何以加宜報告天下奏可於



是孔光愈恐固稱疾辭位詔太師母朝十日  
一入省中置几杖賜餐物官屬按職如故

**集覽**

新息縣名屬汝南今汝寧東南息州是  
召陵縣名屬汝南杜預曰潁川召陵縣

召音劬括地志故城在豫州鄆城東四十五  
里黃郵聚落名在豫州南十里新野南陽新

野縣今屬鄧州宰衡周公為周太宰伊尹為  
商阿衡故采此號以尊之上公禮春官典命

曰上公九命為伯注上公謂王之三公有德  
者加命為二伯二王之後亦為上公稱敢言

之敢猶言不敢文王欲虞芮詩縣篇虞芮質  
厥成注虞芮之君爭田久而不平乃相謂曰

西伯仁人也盍往質焉乃相與朝周入其境  
則畊者讓畔行者讓路入其邑男女異路頒

白者不提挈入其朝士讓為大夫大夫讓為  
卿二國之君感而相謂曰我等小人不可以

履君子之庭乃相讓以所爭田為間田而  
退蘇林曰虞在陝之平陸芮在同之馮翊

**正**

**誤**

黃郵今按南陽郡  
新野縣有黃陞聚

**質實**

一統志云新息漢  
之縣名屬汝南郡

晉為汝南郡治所後魏置東豫州梁改曰西  
豫州又改曰淮州東魏復曰東豫州後周改

息州隋廢唐復置貞觀初廢以縣屬蔡州金  
復置息州元屬汝寧府本朝改州為息縣

屬汝寧府召陵古邑名即春秋時諸侯所盟  
之地秦置縣屬汝南郡漢改屬潁川郡晉省

之故城在開封府鄆城縣東四十五里新野  
漢之縣名屬南陽郡晉為義陽郡治後改義



陽為新野郡治棘陽縣西魏改郡曰黃岡及  
 改棘陽為百寧縣後周以南棘陽縣省入隋  
 仍為新野縣屬鄧州唐省入穰州五代宋金  
 元為新野鎮元復置縣屬鄧州 本朝因之  
 屬南陽府 虞古國名春秋時屬晉戰國時屬  
 魏為吳城漢為河東郡大陽縣地東漢置河  
 北縣後魏置河北郡治此隋初罷郡以縣屬  
 蒲州唐貞觀初改屬陝州天寶初因改漕瀆  
 得古刃有篆文曰平陸遂改平陸縣金元屬  
 解州 本朝因之屬平陽府 芮古國名春秋  
 時芮伯寓居此戰國時為魏國之附庸漢置  
 安戎縣後周改芮城縣及置永樂郡隋省郡  
 以縣屬蒲州唐置芮州貞觀初廢州以縣屬  
 陝州金元屬解州 本朝因之屬平陽府

起明堂辟雍靈臺立樂經徵天下通經異能之

士

莽奏起明堂辟雍靈臺為學者築舍萬區制  
 度甚盛立樂經益博士員經各五人徵天下  
 通一藝教授十一人以上及有逸禮古書天  
 文圖讖鍾律月令兵法史篇文字通知其意  
 者皆詣公車網羅天下異能之士至者前後  
 千數胡氏曰明堂辟雍靈臺雜見於詩禮孝  
 經孟子其制作之詳不可得而聞矣然以理  
 考之王者鄉明而治古之堂今之殿也故孝  
 經以為宗祀之所孟子以為王政之堂然則  
 是天子之外朝猶後世大朝會之正衙也若



呂不韋青陽總章之制劉歆世室重屋之說則豈可盡信乎若靈臺則詩與孟子言之亦燕游之所耳若辟雍則未有明言其義也獨詩有之曰於樂辟雍又曰鎬京辟雍而已夫辟君也雍和也言人君有和德則天地之和應之而天下之心服之也此二詩者亦言與民同樂建立都邑之事而已未遽及學校之政也况其上章又有皇王維辟之云哉王制記天子諸侯之學始有辟雍泮宮之名不知何所本而云也泮水之詩亦未有以見其為學校者獨取匪怒伊教

**集覽** 明堂注見武帝之一言以為證則未矣

注見成帝綏和元年靈臺注見齊武帝永明十年圖識注見光武建武中元元元年河洛讖

文又注見齊武帝永明三年言緯呂不韋青陽總章之制記月令天子春居青陽夏居明堂秋居總章冬居玄堂山堂考索曰陸德明云月令是呂不韋作蔡伯喈云是周公作予考諸月令其中官名時事多不合周法斷非周公贅為之雖用呂氏春秋十二紀之首亦不可專歸之不韋要之補葺而訂正之者漢儒力也劉歆世室重屋之說三代明堂之制夏曰世室殷曰重屋周曰明堂世室宗廟也言代代不毀也重屋正堂若大寢也四阿屋棟皆為重複明堂明政教之堂也見周禮考工記山堂考索曰周禮始於劉歆而成於鄭康成漢成帝時劉向子劉歆校理秘書見之始得列序著于錄畧然冬官亡矣歆以考工



記足之考工記乃前世能識古制者所作也  
 時衆儒並出共排以爲非惟歆獨識焉後鄭  
 康成作禮注泮宮泮通作類胡氏日記曰魯  
 人將有事於上帝必先有事於類宮鄭氏說  
 有事於類宮告后稷也類官郊之學也考諸  
 禮記類官廟之類也若非廟之類欲祀上帝  
 而以始祖祭于學宮何義也哉益知類  
 宮之非學昭昭矣而鄭氏考之未詳

**書法**

成帝之篇詔立辟雍未作而罷書惜  
 之也於是書起明堂辟雍靈臺則莽  
 奏爲之書起明堂辟雍靈臺始此終綱目  
 書起明堂靈臺辟雍三是年光武中元元  
 年晉成帝咸和六年石勒書立明堂辟雍  
 二晉成帝咸康五年張駿齊丙寅年元魏

書定樂始此終綱目書定樂八是年新莽  
 樂經齊丁卯年魏制樂章壬午年梁正雅  
 樂已丑年魏劉芳造樂器己未年西魏制  
 樂隋文帝開皇九年詔定雅樂唐高祖武  
 德九年祖孝孫定樂戊午年後周竇儼正  
 樂書舉經士始此終綱目書經士六是年  
 質帝本初元年晉簡文帝咸安二年秦  
 主陳丁酉年周主五代丁巳年周世宗

**徵能治河者**

時又徵能治河者以百數其大畧異者關並  
 言河決率常於平原東郡左右其地形下而  
 土疏惡聞禹治河時本空此地秦漢以來河  
 決南北不過百八十里可空此地勿以爲官



亭民室韓牧以為可畧於禹貢九河處穿為四五宜有益王橫言河入渤海地高於韓牧所欲穿處往者海溢西南出寢數百里九河之地已為海所漸矣禹之行河水本從西山下東北去周譜云定王五年河徙則今所行非禹之所穿也又秦攻魏决河灌之决處遂大不可復補宜更開空使緣西山足乘高地而東北入海乃無水災司空掾桓譚典其議為甄豐言凡此數者必有一是宜詳考驗皆可豫見計定然後舉事費不過數億萬亦可

**集覽**

以事諸浮食無產業民衣食縣官而為之作乃兩便時莽但崇空語無施行者本空空苦貢反亦虛也下可空同周譜周之世系也更開空更改也空音孔小穴也

**質**

### 升宰衡位在諸侯王上

**實**平原郡名注見光武建武三年東郡注見光武建武八年桓譚沛國相人

**書法**此殊禮也書曰升命猶自上出也以莽之權而猶自上出何於是平帝尚幼太后專之書升所以病太后也然則曷為不斥太后貶必於其重者如是足以示譏矣終綱目書位諸侯王上者三是年獻帝建安十九年晉帝奕太和三年

○尊孝宣廟為中宗孝元廟為高宗○置西海

郡



莽自以北化匈奴東致海外南懷黃支唯西方未有加乃遣使多持金幣誘塞外羌使言太皇太后聖明安漢公至仁天下太平五穀成熟或禾長丈餘或一粟三米或不種自生或不蠶自繭四年以來羌人無所疾苦願獻地內屬乃奏以為西海郡增法五十條犯者徙之以千萬數民始怨矣

**贊**

黃支南蠻國名注見元始元年

### 更定官名及十二州界

分京師置前輝光後承烈二郡更公卿大夫元士官名位次及十二州名分界郡國所屬罷置改易天下多事吏不能紀矣

### 乙丑五年春正月禘祭明堂

**集覽**

禘祭禘胡夾反公羊傳大禘者

何合祭也其合祭柰何毀廟之主陳于太祖未毀廟之主皆升合食于太祖也續漢書三年一禘禘以冬十月五穀成故骨肉合飲食於太祖也又注見後主建興十五年禘禮

○復

### 南北郊

三十餘年間天地之祠凡五徙

### 置宗師

詔曰宗室子自漢元至今十有餘萬人其令郡國各置宗師以糾之致教訓焉



夏四月太師光卒以馬宮為太師

**質實**

馬宮東海戚人

○五月加安漢公莽九錫

**考異**

按篡賊例曰凡篡國隨事異文

而尤謹其始注曰王莽董卓曹操等自其得政遷官皆依范史直以自為自立書之又封拜例曰凡殊禮皆書注曰王莽加號九錫之屬王莽是自為之以自為書則此當書曰安漢公莽自加號宰衡安漢公莽自加九錫今刊本綱目於董卓曹操等凡其遷官加殊禮皆書自惟此二條不書自蓋傳錄闕漏耳

吏民以莽不受新野田而上書者前後四十八萬七千五百七十二人及諸侯王公列侯

宗室見者皆叩頭言宜亟加賞於安漢公乃策命安漢公莽以九錫莽稽首再拜受綠韞袞冕衣裳瑒瑒瑒秘句履鸞輅乘馬龍旂九旒皮弁素積戎路乘馬彤弓矢盧弓矢左建朱鉞右建金戚甲冑一具秬鬯二卣圭瓚二九命青玉珪二朱戶納陛署宗官祝官卜官史官虎賁三千人

**集覽** 九錫何休曰禮緯合文嘉曰禮有九錫一輿馬二衣服三樂則四朱戶五納陛六虎賁七弓矢八鈇鉞九秬鬯皆所以勸善扶不能白虎通曰能安民者賜輿馬能富民者賜衣服能和民者賜樂則民眾多者賜朱戶能進善者賜納陛能退惡者賜虎賁能誅有罪者賜鈇鉞能征不順者賜弓矢孝道備者賜秬鬯舊說解輿馬



謂大輅戎輅各一玄馬二也衣服謂玄衮也樂則謂軒縣之樂也朱戶謂所居之室朱其戶也納陛謂從中階而升也虎賁謂三百人也弓矢彤玃之弓矢也鈇鉞謂大柯斧賜之專殺也秬鬯謂秬鬯之酒賜以祭祀也綠韍詩三百赤韍注韍亦作芾音弗卽鞞也韍爲之所以蔽膝其色視裳其形圓殺直大抵下廣二尺象地上廣一尺象天長三尺象三才頸五寸象五行兩角皆上接革帶以繫之冕服謂之芾祭服謂之鞞名殊而義一也衮冕周禮衮龍衣也衣五章裳四章凡九皆絺繡而畫以爲衮曲阿也謂繡龍蟠曲也五冕圖曰衮冕十二旒以則天數纁玉五采前後各用玉百四十四王祀昊天五帝先王朝覲諸

侯則服之上公亦龍衮前後皆九旒纁玉則用九馬輿服志冕冠垂旒前後邃延注邃垂也延冕上覆瑒瑒瑒杖梗反玉名又音暢瑒補孔反瑒音必瑒佩乃上飾詩瞻彼洛矣鞞瑒有瑒注云鞞容刀鞞也瑒上飾瑒下飾疏云古言鞞猶今言鞞句履句者履舄頭飾出履一寸其形岐頭輿服志赤舄絢履以承大祭周禮履人注句當爲絢絢謂之拘著舄履之頭以爲行戒句音劬又姜踰反疏云狀如刀衣鼻言絢者取自拘持使低目不妄顧視鸞輅注見成帝建始元年乘馬乘去聲馬供武用四匹曰乘侯伯之賜無常以功大小爲度龍旂九旒旂倚也畫兩龍相倚以赤爲之無文彩諸侯所建旒亦作旂旌旗之



旃也禮巾車金路建大旂以賓同姓以封龍  
 旂九旂以象大夫謂象蒼龍宿之形唐車服  
 志一品之旒九旒注周禮通帛為旒九旒至  
 地諸侯九旒至軫大夫七旒至轂士三旒至  
 肩皮弁素積禮司服王眡朝則皮弁服注皮  
 弁之服用十五升白布衣積素以為裳正義  
 曰皮弁以鹿子皮為之高四寸長七寸制如  
 覆杯前高廣後卑銳案積猶辟也感其腰中  
 故謂之素積戎路戎車其飾如德車詳見輿  
 服志彤弓矢彤丹飾也諸侯有大功則賜弓  
 矢得專征伐彤弓以講德習射藏示子孫盧  
 弓矢盧或作旅音龍都反黑也朱鉞金戚鉞  
 戚並斧屬朱鉞謂以丹朱飾鉞之柄金戚謂  
 以黃金飾戚也毛詩兵器圖戚與揚皆鉞鉞

別名傳謂戚為斧揚為鉞鉞大而斧小鉞與  
 二卣秬白許反黑黍也卣丑亮反香草也卣  
 音酉又音由中尊也尊有三品彝中曰卣下  
 曰鬯爾雅疏彝受三斗卣五斗鬯六斗以黑  
 黍米擣鬱金草取汁而煮之和釀為酒其氣  
 芬香條暢故謂之秬卣所以降神也謂當以  
 錫命告其始祖故賜卣禮書云鬱草十二花  
 狀如紅藍卣未裸也實卣其將裸則實彝矣  
 禮九命然後賜秬卣圭瓚以祭祖廟圭瓚禮  
 典瑞曰裸圭有瓚以肆先王以裸賓客鄭玄  
 曰圭瓚卣爵也鄭司農云於圭頭為器可以  
 挹卣裸祭謂之瓚故詩云瑟彼玉瓚黃流在  
 中國語謂之卣圭以肆先王裸先王祭也爵  
 行曰裸漢禮瓚槃大五升口徑八寸下有槃

通鑑綱目卷八 漢書卷五十四 十一



口徑一尺又禮玉人曰裸圭尺有二寸有瓚以祀廟注裸之為言灌也謂始獻酌奠也瓚形如槃其柄用圭有流前注用以灌鬯九命青玉珪禮大宗伯有九儀之命正邦國之位一命受職再命受服三命受位四命受器五命賜則六命賜官七命賜國八命作牧九命作伯又典命曰上公九命為伯其國家宮室車旗衣服禮儀皆以九為節六器圖云以青圭禮東方東生物之方也故圭銳以象春九命然後賜之雜記云公主博三寸厚半寸刻上左右各半寸其下方未戶注見九錫下納陛尊者之階曰納陛孟康曰納內也謂鑿殿基際為陛不使露也顏師古曰尊者不欲露而升陛故納之於雷下虎賁賁舊作奔言其

勇猛如虎之賁騰也王莽以古有勇士孟賁故名虎賁

**書法**

書曰加命猶自上出也以莽之權而猶自上出何於是平帝尚幼太后專

之書加所以病太后也書九錫始此終綱目書九錫十四莽曹操司馬懿司馬昭趙王倫桓玄劉裕蕭道成蕭衍陳霸先楊堅唐王淵王世克朱全忠書加一莽書以書加者二懿全忠皆不受者也書自為復辭始受者二昭裕餘皆書自

**封王惲等八人為列侯**

王惲等還言天下風俗齊同詐造歌謠頌功德凡三萬言詔以惲等宣明德化萬國齊同



皆封為列侯時廣平相班穉獨不上嘉瑞及歌謠琅邪太守公孫闓言災害於公府甄豐劾闓造不祥穉絕嘉應嫉害聖政皆不道穉班捷仔弟也太后曰班穉後官賢家我所哀也闓獨下獄誅穉懼上書陳謝願歸相印入補延陵園郎莽又奏為市無二賈官無獄訟邑無盜賊野無饑民道不拾遺男女異路之制犯者象刑

**集覽**

無二賈言純質也賈

讀曰價象刑孔子曰三皇設言民不違五帝畫象世順機何休曰此孝經緯文也畫音獲畫猶設也其象刑者即唐傳云唐虞之象刑上刑赭衣不純注云純緣也時人尚德義犯刑者但易之衣服自為大耻中刑雜履屨履也下刑墨幪幪巾也使不得冠飾以耻之也

白虎通曰象刑者以衣服象五刑也犯墨者幪巾犯劓者赭其衣犯贖者墨其鬢犯官者扉犯大辟者布其衣梏而無顏緣

**質實**

廣平國名

注見武帝元狩四年瑯琊郡名注見新莽天鳳四年

### 師大司徒宮罷

發定陶恭王母及丁姬冢取其璽綬秋八月太后葬奏恭王母丁姬懷帝太后皇太后璽綬以葬請發冢取其璽綬太后不許莽固爭之太后詔因故棺改葬之莽奏恭王母丁姬棺皆名梓官珠玉之衣非藩妾服請更之奏可



公卿在位皆阿莽指入錢帛遣子弟及諸生四夷凡十餘萬人操持作具助將作掘平之又隳壞恭皇廟冷褒段猶等皆徙合浦徵師丹封義陽侯月餘薨馬宮嘗與議傳太后謚至是為莽所厚故追誅前議者而獨不及宮宮內慚懼上書自言詔以侯就第

**質實**

**書法**

書發冢何甚之也終綱目書戮棺三

是年唐景龍四年武三思天寶十二年李林甫惟三思非譏辭

### 冬十二月安漢公莽弒帝

**考異**

按篡賊例曰以毒弒者加進毒

字而不地注曰如莽冀之類今分注莽因臘日上椒酒置毒酒中帝崩而大書不曰進毒蓋亦

**闕考證**

當加進毒於弒帝之上。按漢書平帝崩于未央宮歛加元服葬康陵綱目於


漢諸帝皆書葬夫何於平帝獨不曰葬康陵無乃失書乎曰非也春秋弒賊不討不書葬以為無臣子也王莽篡賊干統十有四年之久然後劉玄起光武中興眾共誅之綱目不書葬平帝

蓋本春秋

**質實**

一統志云康陵在西安府咸陽縣西二十五里

之法也歟帝益壯以衛后故怨不悅莽因臘日上椒酒置毒酒中帝有疾莽作策請命於泰時願以身代藏策金滕置于前殿敕諸公勿敢言帝崩莽令吏皆服喪三年歛加元服葬康陵班





固曰孝平之世政自莽出褒善顯功以自尊  
盛觀其文辭方外百蠻無思不服休徵嘉應  
頌聲並作至乎變異見於上  
民心怨於下莽亦不能文也  
日為臘記月令孟冬臘先祖羅璧識遺曰鄭  
玄注臘即周禮所謂蜡祭也余讀玉燭寶典  
云臘祭先祖蜡祭百神則蜡與臘異蜡祭因  
饗農以終歲勤動而息之臘獵也獵取禽獸  
祭先祖重本始也二祭寓意不同所以臘于  
廟蜡于郊又注見新莽始建國三年祖臘藏  
策金勝武王有疾周公請命三王欲以身代  
死史錄其策藏之於匱緘之以金故曰金勝  
匱也勝即束縛之義

**集覽**

臘月漢以大寒後戌

**發明**

平帝之終前史雖明言置毒酒中然  
皆以帝崩為文至綱目始正名定罪  
直書弒逆者所以誅亂臣賊子為萬世戒  
爾凡莽紛紛制作褒賞殺戮不可勝紀綱  
目雖不盡削要之大逆大惡之人其姦  
偽之迹初無足深論者故亦得畧之

### 以平晏為大司徒

**書法**

帝弒矣晏之為司徒孰以之以之者  
莽也凡上書事下書拜官官其事也

上書弒帝下書以晏為司徒晏蓋與聞乎  
弒者故莽封拜平晏不書書曰其黨與合  
而觀之當時之獄具矣



○太皇太后詔徵宣帝玄孫又詔安漢公莽居

攝踐祚

太后與群臣議立嗣時元帝世絕而宣帝曾孫有見王五人列侯四十八人莽惡其長大曰兄弟不得相為後乃悉徵宣帝玄孫選立之初泉陵侯劉慶上書言皇帝富於春秋宜令安漢公攝行天子事如成王周公故事群臣皆以為宜至是前輝光謝囂奏浚井得白石有丹書文曰告安漢公莽為皇帝太后曰此誣罔天下不可施行太保舜謂太后事已如此無可奈何莽非敢有他但欲稱攝以重其權填服天下耳太后力不能制乃下詔曰

已徵孝宣皇帝玄孫二十三人差度宜者以嗣孝平皇帝之後玄孫年在襁褓不得至德君子孰能安之其令安漢公居攝踐祚如周公故事具禮儀奏於是群臣奏言請安漢公踐祚服天子黻冕背斧依于戶牖之間南面朝群臣聽政事車服警蹕民臣稱臣妾皆如天子之制祭贊曰假皇帝民臣謂之攝皇帝自稱曰予平矣朝事常以皇帝之詔稱制其朝見太皇太后皇帝皇后皆服臣節自施政教於其宮家國采如諸侯禮儀故事詔曰可

集覽

見王見在為王者前輝光莽分京師置前輝光後承烈二郡踐阼記文王世子成王幼不能泣阼周公相踐阼而治注泣視踐履也成王不能視阼階行人君之事周公



代履阼階攝王位治天下背斧依背亦作倍  
斧亦作黼依亦作屨禮圖屨之狀從廣八  
尺畫爲斧形今之屏風則遺象也昔周公朝  
諸侯於明堂天子負斧依南面而立鄭玄曰  
天子周公也負之言倍也斧依爲斧文屏風  
於戶牖間周公於前立馬家國采刑法志采  
地注采官也因官食地曰采地羅璧識遺曰  
采者采取賦稅自供不得有其土地人民仍  
不得世封後漢馮魴其先食菜馮城質實  
貢父曰案文菜當爲采音乃爲菜耳陵泉  
漢之縣名屬零陵郡東漢郡治於此晉以後  
因之隋改泉陵爲零陵縣以應陽永昌祁陽  
三縣省入屬永州唐宋元仍舊○  
本朝因之爲永州府治所仍屬焉

**書法**

書又詔何病太后也既詔徵宣帝玄  
孫矣未至而又詔莽居攝踐阼然則

王莽之篡太后  
不得辭其咎矣

丙寅 孺子嬰居攝元年春正月王莽祀南郊

**書法**

前弑書安漢公莽矣此書王莽何不  
予其祀南郊也綱目別嫌明微故於

此斥書之自是有事  
皆斥書莽而削其姓

**發明**

莽之竊國固無足言然自居攝以前  
綱目皆書其官者明其猶爲漢之臣

子也至是始削去之而稱  
王莽自此以後止書莽矣



○三月立宣帝玄孫嬰為皇太子號曰孺子

嬰廣戚侯勲之孫顯之子也年

**質實**

一統志云廣戚

二歲託以為卜相最吉立之漢之縣名屬沛郡元魏省之故城在徐州城西北一百八十里沛縣境內

尊皇后曰皇太后○夏四月安眾侯劉崇起兵

討莽不克死之

安眾侯劉崇與相張紹謀曰莽必危劉氏天下非之莫敢先舉此乃宗室之耻也吾帥宗族為先海內必和從者百餘人遂進攻宛不得入而敗

**質實**

安眾縣名注見獻帝

建安三年宛縣名注

見周赧王十七年

**書法**

於是崇帥百餘人攻宛不入而敗耳書起兵死之予倡義也書死之始此

終綱曰書死之五十五是年劉崇二年翟義莽已巳年劉快靈帝中平四年傳熒獻

帝建安二十三年耿紀等後主景耀三年魏王經炎興元年傅余諸葛瞻父子北地王謙晉武帝太康元年吳張悌惠帝永熙七年周處永興元年劉沈嵇紹懷帝永嘉五年譙登愍帝建興元年庾岷等四年吉朗元帝建武元年辛賓大興四年段匹磾永昌元年譙王承成帝咸和三年卜壺桓彝哀帝興寧三年沈勁孝武帝大元元年



涼掌據四年吉挹十年燕王亮十三年後  
秦徐嵩十四年秦石毛氏安帝元興元年  
姚平義熙十年何無忌齊壬午年顏見遠  
梁丁未年魏崔楷巳巳年梁常燦張暉等  
唐戊寅年劉感呂子臧巳卯年張善相辛  
巳年李玄通高宗龍朔二年來濟中宗嗣  
聖十五年高獻玄宗天寶十四年李愷等  
十五年顏果卿張興肅宗至德二年張巡  
等德宗建中元年段秀實懿宗咸通四年  
蔡襲五代癸未年唐裴約梁王彥章庚寅  
年唐姚洪辛卯年夏魯奇甲午年宋令詢  
乙巳年晉沈斌辛亥年漢鞏廷美乙卯年  
蜀趙崇溥丁巳年唐仁贍戊  
午年唐張彥卿凡六十一人

**發明**

劉崇起兵從者僅百餘人可謂微之  
微者矣然書爵書討書死之者所以

正逆賊之罪褒死節  
之誼為後世勸也

五月太皇太后詔莽朝見稱假皇帝

群臣復白劉崇等謀逆者以莽權輕也宜尊  
重以填海內太后乃詔莽朝見稱假皇帝

冬十月朔日食○西羌反

西羌龐恬等怨莽奪其地反  
攻西河太守莽遣兵擊破之

**集覽**

龐恬西  
羌種名

丁卯二年夏五月莽更造貨



錯刀一直五千契刀一直五百大錢一直五十與五銖錢並行民多盜鑄者禁列侯以下不得挾黃金輸御府

**集覽**

錯刀食貨志貨實於金利於刀如淳

曰名錢為刀以其利於民也莽造錯刀蓋身形如刀以黃金錯其文曰一刀直五千錯塗也契刀其環如大錢徑寸二分文曰契刀五百

**書法**

自呂氏乙卯始書行八銖錢終西漢之世錢貨凡七變綱目悉書之於是

莽鑄大錢一直五十不書書更造貨畧之也巳巳作小錢重一銖不書書禁剛卯金刀庚午更作金銀龜貝錢布不書書作寶戊作貨布貨泉二品不書書改錢貨

法皆畧之也其畧之何數更也莽自居攝以至傳首十有八年耳而錢貨凡四變莽之煩於改作類如此自古以來錢幣數變未有如莽之亟者也

秋九月東郡太守翟義起兵討莽立劉信為天

子三輔豪桀起兵應之莽遣兵拒擊義戰不克

死之信亡走

東郡太守翟義方進之子也與姊子陳豐謀曰新都侯攝天子位必代漢家今宗室衰弱外無疆藩天下傾首服從莫能亢扞國難吾父子受漢厚恩義當為國討賊欲舉兵西誅



不當攝者選宗室子孫輔而立之設今時命不成死國埋名猶可以不慚於先帝汝肯從我乎豐年十八勇壯許諾義遂與都尉劉宇嚴鄉侯劉信信弟璜結謀勒其車騎材官士募郡中勇敢部署將帥立信為天子義自號大司馬柱天大將軍移檄郡國言莽鴆殺孝平皇帝攝天子位欲絕漢室今天子已立共行天罰郡國皆震比至山陽衆十餘萬莽聞之惶懼不能食太皇太后謂左右曰人心不相遠也我雖婦人亦知莽必以是自危莽乃拜孫建等七人為將軍將甲卒發奔命以擊義三輔豪桀趙朋霍鴻等聞義起自稱將軍燒官寺殺都尉相與謀曰諸將精兵悉東京師空可攻長安衆至十餘萬火見未央前殿

莽復拜王級為將軍西擊朋等曰抱孺子禱郊廟會群臣而稱曰昔周公攝政而管蔡挾祿父以畔今翟義亦挾劉信而作亂自古大聖猶懼此况臣莽之斗筭群臣皆曰不遭此變不章聖德莽依周書作大誥諭天下以當反位孺子之意諸將東至陳留與翟義會戰義敗死竟不得信

**集覽**

發奔命發徵發也奔命謂奔命者荀子曰奔命者

**質實**

東郡注見光武建武八年翟義汝南上蔡

**發明**

王莽篡逆舉朝和之舉天下和之是無一人知義者前日劉崇起兵從者



僅百餘人今翟義之起遂至十餘萬眾義兵亦少振矣雖不克而死然聲大義於天下使賊莽之罪益以暴著其有功能於漢為如何哉三輔應者書曰豪傑所以褒從義之士為臣子之勸爾綱目急於討賊如此其為後世之戒豈不嚴哉

戊辰 初始元年春地震○三輔兵皆破滅

王綬等擊趙朋霍鴻皆殄滅諸縣悉平莽乃置酒白虎殿治校軍功依周制爵五等以封功臣當賜爵關內侯者更名曰附城莽於是自謂威德日盛大獲天人之助遂謀即真之事矣

書法

不書莽破滅之何不以逆加順也故上書義戰不克死之此書三輔兵皆破滅不書漢兵與莽守將甄浮梁丘賜戰不利皆不以逆加順之辭也綱目訖莽之敗凡戰皆不以莽主之

秋九月莽母功顯君死

莽母死意不在哀自以居攝踐祚奉漢太宗之後為功顯君總縑弁而加麻環經如天子弔諸侯服凡壹甲再會而令孫新都侯宗為主服喪三年司威陳崇奏莽兄子光殺人莽怒均責光光遂母子自殺初莽以事母養嫂撫兄子為名及後悖虐復以示公義焉

集



**覽** 總縗弁而加麻環經 周禮司服王為諸侯

經者如爵弁而素加環經鄭司農云環經謂弁經服謂之環言輕細如環之形

**書法** 莽母何以書莽不子也卒書曰死綱

書死莽太師書死莽大夫書死所以賊莽也凡盜賊書死

**發明** 莽母不書卒而書死惡其母所以惡

嫂及其子光削而不書者大惡之賊不責其小罪也

### 十一月太皇太后詔莽號令奏事母言攝

劉京言齊郡新井扈雲言巴郡石牛臧鴻言扶風雍石莽首迎受十一月莽奏壬子冬至

巴石牛雍石文皆到未央殿前臣與太保舜等視天風起塵冥風止得銅符帛圖於石前

文曰天告帝符臣莽敢不承用臣請號今天下天下奏言事母言攝以居攝三年為初始


元年用應天命臣莽夙夜養育隆就孺子令與周之成王比德俟加元服復子明辟如周

公故事 **集覽** 新井齊郡臨淄縣昌興亭長辛

奏可 皇帝當為真即不信此亭中當有新井晨起

視之誠有新井入地且百尺石牛在巴郡雍石在扶風郡雍縣是也復子明

**質實** 齊郡注見





通鑑綱目卷之八  
漢書卷之八  
三十五

桓帝永康元年青州巴郢注見獻帝建安十年扶風郡名注見周顯王八年岐縣雍縣名注同上年

**書法**於是莽奏請也不書直書太皇太后詔何莽之篡太后成之也故自詔居

攝詔稱假皇帝詔母言攝每進必有太皇太后所以深病之也

十二月哀章作銅匱以獻莽莽自稱新皇帝更號太皇太后為新室文母太皇太后

梓潼人哀章學問長安素無行作銅匱為兩檢署其一曰天帝行璽金匱圖其一署曰赤

帝璽邦傳予皇帝金策書日昏時衣黃衣持匱至高廟以付僕射僕射以聞莽至高廟拜受金匱神禪御王冠謁太后還坐未央宮前殿下書曰皇天上帝隆顯大祐屬予以天下兆民赤帝漢氏高皇帝之靈承天命傳國金策之書予甚祗畏敢不欽受已御王冠即真天子位建有天下之號曰新以十二月朔為始建國元年正月之朔時以孺子未立璽藏長樂宮莽請之太后不肯授莽使安陽侯舜諭指太后怒罵之曰而屬父子宗族蒙漢家力富貴累世既無以報受人孤寄乘便利時奪取其國不復顧恩義人如此者狗猪不食其餘天下豈有而兄弟邪且若自以金匱符命為新皇帝變更正朔服制亦當自更作璽

通鑑綱目卷之八  
漢書卷之八  
三十五



傳之萬世何用此亡國不祥璽為而欲求之我漢家老寡婦旦暮且死欲以此璽俱葬終不可得太后因涕泣而言旁側長御以下皆垂涕舜亦悲不能自止良久乃仰謂太后臣等已無可言莽必欲得傳國璽太后寧能終不與邪太后聞舜語切恐莽欲賜之乃出漢傳國璽投之地曰我老已死如而兄弟今族滅也莽又欲改太后漢家舊號易其璽綬於是張永獻符命言太皇太后當為新室文母太皇太后莽從之班彪曰三代以來王公失世稀不以女寵及王莽之興由孝元后歷漢四世為天下母饗國六十餘載群弟世權更持國柄五將十侯卒成新都位號已移於天下而元后卷卷猶握一璽不欲以授莽婦人

之仁 悲夫 等已無可言 顏師古曰言不可諫


止也 淳南王若虛諸史辯惑曰顏說非也其意蓋云不足道而已 新都謂新都侯王莽也

案新都屬廣漢郡今成都府新都縣 卷卷顏師古曰讀與奉奉同前書賈捐之傳敢昧死

竭卷 臣等已無可言今按王舜意謂固

卷 正誤 知不可但事勢如此無可說者

質實 一統志云梓潼郡名注見獻帝建安十八年安陽縣名注見秦二世三年新都漢之縣名屬廣漢郡後置新都郡晉徙新都郡治維縣仍屬焉梁置始康郡西魏郡廢隋改新都曰興樂縣後併入成都唐復置新都縣宋元仍舊 本朝因之改屬成都府





**書法**

書稱帝有之矣未有書自稱皇帝者此其書自稱何若曰哀章作銅匱耳而莽遽自稱其非天命明矣故雖以十二月朔為元年正月朔不書不成之為帝也終綱目書自稱皇帝二王莽趙王倫皆無故而然者也

**發明**

書以莽為大司馬者太母也書詔莽居攝踐阼者亦太母也書詔莽稱假皇帝書詔莽號令奏事母言攝者又皆太母也莽文為姦飾詐行脅制之術元后固無如之何然非賴其主之於內亦何以肆其謀哉至於改號即真乃始卷卷於一璽蓋已晚矣綱目書莽篡竊之由一則曰太皇太后二則曰太皇太后所以推原其本

為後世外戚之戒爾後之母后欲私其家者盍亦以是為鑒乎

**巳**新莽始建  
**巳**國元年

**考異**

按歲年例曰篡賊朱注國名墨注年號則此新莽二字當

用白字

春正月莽廢孺子為定安公孝平皇后為

定安太后

莽策命孺子為定安公封以萬戶地方百里立漢祖宗之廟於其國與周後並行其正朔服色以孝平皇后為定安太后讀策畢莽親執孺子手流涕歔歔曰昔周公攝位終得復子明辟今予獨迫皇天威命不得如意哀歎良久中傅將孺子下殿北面稱臣百僚陪位



莫不感動定安第置門衛使者監領敕阿乳  
母不得與語常在四壁中至長大不能名六  
畜 **質實** 一統志云定安漢縣名屬安定郡  
後廢之故城在延安府寧州城內

### 按金匱封拜其黨與

莽按金匱封拜王舜平晏劉秀哀章為四輔  
甄邯王尋王邑為三公甄豐王興孫建王盛  
為四將凡十一公王興故城門令史王盛賣  
餅兒莽按符命求得此姓名十餘人兩人容  
貌應卜相徑從布  
衣登用以示神焉

**書法** 特筆也於是封拜者十一公  
不悉書書曰其黨與賤之也

### 改諸官名降漢諸侯王皆為公王子侯皆為子

王二十二人侯  
百八十一人

### 立九廟以漢高廟為文祖廟

莽因漢承平之業一朝有之其意未滿陜小  
漢家制度欲更為疏闊乃自謂黃帝虞舜之  
後至齊王建孫濟比王安失國齊人謂之王  
家因以為氏故以黃帝為初祖虞舜為始祖  
追尊陳胡公為陳胡王田敬仲為齊敬王謚  
濟比王安為愍王立祖廟五親廟四天下姚  
媯陳田王五姓皆為宗室以漢高  
廟為文祖廟漢氏園廟祠薦如故

**集覽** 以漢高廟



為文祖廟書舜典受終于文祖蔡氏傳曰受終者堯終帝位之事而舜受之也文祖者堯始祖之廟未詳所指為何人今莽以漢高廟為文祖廟者欲法舜受終之義

### 禁剛卯金刀

莽以劉之為字卯金刀也詔正月剛卯金刀之利皆不得行乃罷錯刀契刀及五銖錢更作小錢徑六分重一銖與前大錢五十者為二品欲防民盜鑄乃禁不得挾銅炭

### 夏四月徐鄉侯劉快起兵討莽不克死之

**質實**

一統志云徐鄉漢之縣名屬東萊郡東漢省之故城在登州府黃縣界內武帝封膠東五子為

### 徐鄉侯 即此 ○ 莽禁不得買賣田及奴婢

莽曰古者一夫百畝什一而稅秦壞聖制廢井田疆者規田以千數弱者曾無立錐之居又置奴婢之市與牛馬同闌制於民臣顛斷其命繆於天地之性人為貴之義漢氏減輕田租三十稅一常有更賦罷癘咸出豪民侵陵分田劫假實什稅五也故富者驕而為邪貧者窮而為姦俱陷于辜刑用不錯今更名天下田曰王田奴婢曰私屬皆不得買賣其男口不盈八而田過一井者分餘田予九族鄉里鄉黨故無田今當受田者如制度敢有非井田聖制無法惑眾者投諸四裔以禦魑魅如皇始祖考虞帝故事胡氏曰井田良法



致治平之本也。古之帝王以天下為公，視民饑寒如在己，故均地利以予民，而不專其奉。加以公卿諸侯選賢舉德，共行此道，持以悠久，故法立而弊不生，維持千有餘年。及秦廢之，漢不能復。至董仲舒始欲以限田漸復古制，其意甚美，然終不能行者，以人主自為兼井，無以使民興於廉也。又况莽賊而能行乎？然井田實萬世之良法，而買賣奴婢之禁亦仁政所當先，不可以莽。

**集覽** 與牛馬同闡莽所嘗為，而指以為非也。本傳闡作蘭，顏師古曰：蘭，遮蘭也。即牛馬蘭圈。分田劫假，食貨志注：分田謂貧者無田，取富者田耕共分。所收假者，貧人賃富人田，劫者富人劫奪其稅，侵欺之也。刑用不錯，錯置也。古者民不犯

法，刑錯而不用。今則刑用而不錯。四裔賈逵曰：四裔之地，去王城四千里，裔，衣裾也。徐廣曰：裾，衣邊也。故謂之四裔。井田良法，穀梁傳：宣十五年，古者三百步為里，名曰井田。井田者，九百畝，公田居一。范甯注：出除公田八十畝，餘八百二十畝，故井田之法，八家共一井。八百畝，餘二十畝，家居二畝半，為廬舍。楊士勛疏云：何休又云：古者井田之法，一夫一婦受田百畝，身與父母妻子五口，以為一戶。公田十畝，又廬舍二畝半，凡為田一頃一十二畝半也。八家而有九頃，故曰井田。若五口之外，名曰餘夫。餘夫率受田二十五畝半，記異聞耳。於范氏注亦無所取。



秋遣五威將帥班符命更印綬

遣五威將王奇等十二人班符命四十二篇於天下王侯官吏外及蠻夷皆即授新印綬因收故漢印綬五威將乘乾文車駕坤六馬背負驚鳥之毛服飾甚偉每一將各置五帥將持節帥持幢東至夫餘南歷益州西至西域北至匈奴庭

**集覽**驚鳥顏師古曰

驚必滅反雉屬即駿驥也釋名雉之慙惡者陸佃云冠背毛黃項上綠胸腹洞赤可禦火夫餘地名在長城北本高麗國王子名東明者王欲殺之走渡施掩水因都夫餘故以為號夫通質實夫餘東夷國名注見桓帝延熹九年益州郡名注見武帝元狩

九年西域注見哀帝元熹元年匈奴庭注見武帝元狩四年

冬霜桐華大雨雹

庚二午年春二月莽廢漢諸侯王為民

五威將帥還奏事漢諸侯王為公者悉上璽綬為民以獻符命封侯者三人班固曰漢興懲秦孤立之敗尊王子弟大啓九國諸侯比境周匝三垂天子自有三河東郡潁川南為陽自江陵以西至巴蜀北自雲中至隴西與京師內史凡十五郡公王列侯頗邑其中而藩國大者跨州兼郡連城數十宮室百官同制京師可謂矯枉過其正矣然卒折諸呂之難



成太宗之業者亦賴之於諸侯也諸侯原本以大末流濫以致溢小者淫荒越法大者睽孤橫逆以害身喪國故文帝分齊趙景帝削吳楚武帝下推恩之令而藩國自析景帝遭七國之難抑損諸侯減黜其官武有衡山淮南之謀作左官之律設附益之法諸侯惟得衣食稅租不與政事至於哀平之際皆繼體苗裔親屬踈遠生於帷牆之中不為士民所尊執與富室亡異而本朝短世國統三絕是故王莽知漢中外殫微本末俱弱無所忌憚生其姦心因母后之權顛作威福詐謀既成遂據南面之尊分遣五威之吏馳傳天下班行符命漢諸侯王厥角稽首奉上璽轂惟恐在後或乃稱美頌德以求容媚豈不哀哉

**集**

**覽**

三垂東南西三邊末流濫以致溢原父曰以其原本大而末流易於汎濫故滿而溢睽孤橫逆易睽卦注睽乖之時孤立無援故曰睽孤孟子曰有人待我以橫逆注不順理也七國之難景帝時吳王濞膠西王卬膠東王雄渠菑川王賢濟南王辟光楚王戊趙王遂七國反衡山淮南之謀武帝時衡山王賜淮南王安二國謀反左官之律漢書音義曰人道尚右故降秩為左遷捨天子仕諸侯為左官附益之法漢書音義曰謂背正法而厚於私家也厥角稽首書泰誓百姓懍懍若崩厥角注危懼不安若崩摧其角無所容頭孟子盡心若崩厥角稽首注若崩厥角頌角犀厥地名稽首拜命亦以首至地也

**正誤**



大啓九國周匝三垂今按漢都長安在西當  
謂東南北三邊九國者燕代齊趙梁楚吳淮  
南長  
沙也

### 立五均司市錢府官令民各以所業爲貢權酒

酤

國師公劉秀言周有泉府之官收不售與欲  
得莽遂於長安及洛陽邯鄲臨淄宛成都立  
五均司市錢府官司市常以四時仲月定物  
上中下之賈各爲其司平民賣物不售者均  
官考驗得實用其本賈取之物貴過平一錢  
則以平賈賣與民賤減平者聽民自相與市

又民有乏絕欲賒貸者錢府與之每月百錢  
收息三錢諸取金銀連錫鳥獸魚鼈畜牧桑  
蠶織紉紡績補縫工匠醫巫卜祝方技商賈  
皆各自占所爲於其所之縣官除其本計其  
利十分之而以其一爲貢敢不自占自占不  
以實者盡沒入所采取而作縣官一歲義和  
魯匡復奏請 **集覽** 泉府周禮泉府掌以市之  
權酒酤從之 征布歛市之不售鄭司農  
云故書泉或作錢收不售與欲得民賣物不  
售者均官收之民欲賒貸者泉府之官與之  
周禮司市以泉府同貨而歛賒注同者謂民  
貨不售則爲歛而買之民無貨則賒貫而予  
之五均食貨志樂語有五均鄧展曰樂語樂  
元語河間獻王所傳道五均事贊曰其文云



天子取諸侯之士以立五均市無二賈四民  
 常均司市周禮司市掌市之治教政刑為其  
 司平平去聲平定物賈也周禮司市質劑鄭  
 司農云今月平是也平皮命反連錫連本作  
 鑣鉛礦也錫鑠也自占注見武帝元狩四年  
 所之縣句絕之適也作縣官於所之之縣役  
 作一歲以示罰也義和莽改大  
 司農曰義和後又改名納言 **正誤** 於其所  
 除其本計其利今按史註不敢指斥天子謂  
 為縣官此云縣官猶今言官司公家也於其  
 所之當為一句謂所適之處也食貨志作於  
 其在所之縣官多一在字謂所在處之縣官  
 也下文復出縣官字集覽  
 破句專指所適之縣非也

**書法**

漢武之篇書初權酒酤至昭帝罷之  
 矣於是再見自是至晉有書開弛無

書權者則莽  
 復作備故也

**匈奴擊車師戊巳校尉官屬殺尉應之**

莽既班四條護烏桓使者告烏桓毋得復與  
 匈奴皮布稅匈奴責稅收酋豪縛倒懸之酋  
 豪昆弟共殺匈奴使單于聞之發兵攻擊毆  
 婦女弱小且千人去置左地曰持馬畜皮布  
 來贖之烏桓持財畜往贖匈奴受留不遣及  
 五威將帥至匈奴易單于故印故印文曰匈  
 奴單于璽莽更曰新匈奴單于章單于再拜  
 解故印綬奉上將帥受著新綬不解視印至



夜右帥陳饒曰單于視印見其變改必求故印此非辭說所能距也不如椎破故印以絕禍根將帥猶與莫有應者饒燕士果悍即引斧椎壞之明日單于果白將帥曰漢諸侯王已下乃有漢言章今去璽加新與臣下無別願得故印將帥示以故印單于知已無可柰又多得賂遺即遣弟隨將帥入謝將帥還過左地見烏桓民多以聞詔匈奴還之單于重怨恨乃遣兵萬騎以護送烏桓為名勒兵朔方塞下莽遣兵擊之當出西域車師後王憚於供給謀亡入匈奴都護但欽斬之其兄狐蘭支遂將眾二千降匈奴單于遣兵與共擊車師殺後城長傷都護司馬戊巳校尉吏陳良終帶等殺校尉將人眾降匈奴

**集覽**

四條平帝元始二年頒四條於匈奴酋豪酋長豪疆也酋慈秋反不音囚酋長魁帥之稱左地即左方也先匈奴左方王將居東方直上谷元封六年徙左方兵直雲中猶與注見秦孝文王元年猶豫有漢言章漢之諸侯王印乃有漢字而謂之章也按漢官儀吏秩比二千石以上銀印龜紐其文曰章刻曰某官之章後城長後王城之長戊巳校尉吏陳良終帶皆戊巳校尉之吏也

**冬莽罷漢廟及諸劉為吏者**

孫建奏陳良終帶自稱廢漢大將軍亡入匈奴漢氏宗廟不當在長安城中及諸劉當與



漢俱廢請皆罷之莽曰可嘉新公國師等三十二人皆知天命勿罷賜姓曰王唯國師以女配莽子

**集覽**

嘉新公國師劉秀也加封為嘉新公

### 更號定安太后曰黃皇室主

太后年未二十自劉氏廢常稱疾不朝會莽欲嫁之乃更號為黃皇室主欲絕之於漢令孫建世子盛飾將醫問疾太后大怒因發病不肯起

**書法**

書何予守義也終綱目故后書更號者二黃皇室主隋樂平公主皆守義者也據此齊太原公主不書更號改節故也

### 十二月雷莽敗匈奴單于為降奴服于遣其眾

### 軍孫建等擊之

莽恃府庫之富欲立威匈奴乃更名匈奴單于曰降奴服于遣孫建等率十二將分道並出募卒三十萬人先至者屯於邊郡須畢具乃同時出窮追匈奴內之丁令分其國土人民以為十五立呼韓邪

**質實**

丁令西域國名注見武帝天漢

子孫十五人皆為單于

**書法**

戰國之大夫稱其所以別外大夫也莽雖篡逆天下一人矣則莽臣何以



書其若曰其所謂將軍云爾不予其有將軍也

### 更作寶貨

莽下書曰寶貨皆重則小用不給皆輕則僦載煩費輕重大小各有差品則用便而民樂於是更作金銀龜貝錢布之品名曰寶貨凡五物六名二十八品百姓憤亂其貨不行乃但行小錢直一與大錢五十二品盜鑄者不可禁乃重其法一家鑄錢五家坐之沒入為奴婢百姓便安漢五銖錢以莽錢大小兩行難知又數變改不信皆私以五銖錢市買莽復下書諸挾五銖錢者投四裔抵罪者不可勝數於是農商失業食貨俱廢民人至涕泣

於市

**集覽**

僦載僦子就反賃也平準書注索隱曰服虔謂載云僦言所輸物不足償其顧載之費也龜貝古者貨貝寶龜食

貨志曰金刀龜貝所以分財布利通有無者也注龜以十占貝以表飾又有十朋五貝皆用為貨其各有多少兩貝為朋故直二百一十六元龜十朋故直二千一百六十以下各有差錢布索隱曰周景王鑄大錢布泉者言貨流布民間故周禮有三夫之布食貨志云貨布長二寸五分首長八分足枝長八分

莽將軍甄豐自殺莽遂殺劉棻甄尋丁隆等數

百人



莽之謀篡也。吏民爭為符命，皆得封侯。其不為者，相戲曰：「獨無天帝除書乎？」司命陳崇白：「莽此開姦臣作福之路，而亂天命，宜絕其原。」莽亦厭之，遂使尚書驗治。非五威將率所誅，皆下獄。初，甄豐、劉秀、王舜為莽腹心，唱導在位，褒揚功德，安漢宰衡之號，皆所共謀。而豐等亦受其賜，並富貴矣。非復欲令莽居攝也。居攝之萌，出於劉慶、謝囂等。莽羽翼已成，意欲稱攝。豐等承順其意，莽輒復封豐等子孫，以報之。豐等爵位已盛，心意已滿，又實畏漢宗室，天下豪桀而疏遠，欲進者，並作符命。莽遂據以即真。舜、秀內懼而已。豐素剛彊，莽覺其不說，而豐子尋復作符命，言黃皇室主當為尋妻。莽怒曰：「黃皇室主，天下母，此何謂也！」

收捕尋、豐自殺。尋亡，捕得，辭連國師公秀子。棻及門人丁隆等牽引公卿黨親列侯以下死者數百人。乃流棻于幽洲，放尋于三危。殛隆于羽山，皆驛車載其屍，傳至云。

**集覽**

棻扶分反。幽洲，馬融曰：「北裔也。水中可居者曰洲。」帝堯本紀作幽陵。括地志云：「故龔城在檀州燕樂縣界。」故老傳云：「舜流共工居此城。」崇山，南裔也。在今澧州。正義曰：「張揖云：崇山即狄山也。」按海外經云：「狄山，帝堯葬其陽。」三危，西裔也。括地志云：「三危山有三峯，故名。」三危一名卑羽山，在沙州敦煌縣東南三十里。鄭玄引河圖及地說云：「三危在鳥鼠山西南，與岐山相連。」或曰：「今金城河關縣西南羌地是。」濱于析支，至于河首，綿亘千里。羽山東裔。



也括地志云羽山在今沂州臨沂縣索隱曰  
 案水經羽山在東海祝其縣南殛鯀之地杜  
 預曰俗名懲父山祝其夾谷之地  
 傳致傳株戀反驛遞也致送詣也  
 幽洲洲一作州在順天府密雲縣東北五十  
 里卽共城是也括地志云故共城在檀州燕  
 樂縣界乃舜流共工于幽州之地崇山在岳  
 州府慈利縣西北三十里舜放驩兜于崇山  
 卽此三危山名在陝西行都指揮使司故沙  
 州城東南二十里其山三峯峭絕舜殺三苗  
 于三危卽此羽山在登州府城東南三十里  
 舜殛鯀于羽山卽此又淮安府贛榆縣西北  
 八十里有羽山亦言是舜  
 殛鯀之處二說未詳孰是

**書法**

於是莽旣卽真豐不悅莽覺之及豐  
 子尋作符命莽收捕尋豐自殺莽有  
 誅意於豐則曷爲止以自殺書罪豐也豐  
 以莽卽真故不悅猶有天理焉則其罪之  
 何豐爲莽腹心以成其篡莽事已成而始  
 不悅則已晚矣書曰自殺若曰其所自取  
 云爾下書遂殺劉棻等數百人則甚莽也  
 前書殺敬武公主等數百人此書殺劉棻  
 等數百人而  
 兵起繼之矣

**起八風臺**

莽始興神僊事以方士  
 言起八風臺臺成萬金  
**集覽**  
 八風臺觀四方  
 而高者曰臺以



別八方之風也左傳隱五年舞所以節八音而行八風又昭二十年八風注易緯通卦驗云東北曰條風東曰明庶風東南曰清明風南曰景風西南曰涼風西曰閭闔風西北曰不周風北曰廣莫風條風一名融風明庶風一名谷風景風一名凱風呂氏春秋八風東北焱東滔東南熏南巨西南涼西颺西北厲北寒漢魏鮮正月旦日決八風風從南大旱西南小旱西有兵西北戎菽為小雨趣兵北為中歲東北為上歲東大水東南民有疾疫歲惡

辛三年 匈奴諸部分道入寇殺守尉畧吏民州郡

**兵起** **考異**

提要書曰分道入塞按征伐例中國無主但云入塞據四年書貉人入邊

當從提要為是

莽遣將將兵多齎珍寶至雲中塞下招誘呼韓邪單于諸子右犁汗王咸成子登助三人至則脅拜咸為孝單于助為順單于皆厚加賞賜咸走出塞傳送助登長安後助病死以登代之單于聞之怒曰先單于受漢宣帝恩不可負也今天子非宣帝子孫何以得立遣兵入雲中塞大殺吏民歷告左右部諸邊王入塞殺大守都尉畧吏民畜產不可勝數是時諸將在邊以大衆未集未敢出擊嚴尤諫曰臣聞匈奴為害所從來久矣未聞上世必



有征之者也。後世三家周秦漢征之，然皆未有得上策者也。周得中策，漢得下策，秦無策焉。周宣王時，獫狁內侵，至于涇陽，命將征之，盡境而還。其視戎狄之侵，譬猶蟲蟲毆之而已。故天下稱明是謂中策。漢武帝選將練兵，約齊輕糧，深入遠戍，雖有克獲之功，胡輒報之，兵連禍結三十餘年，中國罷耗，匈奴亦創艾而天下稱武，是為下策。秦始皇不忍小耻，而輕民力，築長城之固，延袤萬里，轉輸之行，起於負海，疆境既完，中國內竭，以喪社稷，是為無策。今天下比年饑饉，西北邊尤甚，發三十萬眾，具三百日糧，東援海岱，南取江淮，然後乃備計其道里，一年尚未集合，兵先至者，聚居暴露，師老械弊，執不可用，此一難也。邊

既空虛，不能奉軍糧，內調郡國，不相及，屬此二難也。計一人三百日食用糲，十八斛，非牛力不能勝，牛又當自齎食，加二十斛，重矣。胡地沙鹵多，乏水草，以往事揆之，軍出未滿百日，牛必物故，且盡餘糧，尚多人不能負，此三難也。胡地秋冬甚寒，春夏甚風，多齎釜鍤薪炭，重不可勝，食糲飲水，以歷四時，師有疾疫之憂，是故前世伐胡，不過百日，非不欲久，執力不能，此四難也。輜重身隨，則輕銳者少，不得疾行，虜徐遁逃，勢不能及，幸而逢虜，又累輜重，如遇險阻，銜尾相隨，虜要遮前後，危殆不測，此五難也。大用民力，功不可必立，臣伏憂之。今既發兵，宜縱先至者，令臣尤等深入，霆擊，且以創艾，胡虜莽不聽，轉兵穀如故，吏



士屯邊者所在放縱而內郡愁於徵發民棄城郭始流亡為盜賊并州平州尤甚莽遣中郎繡衣執法分督之皆乘便為姦撓亂州郡北邊自宣帝以來數世不見煙火之警人民熾盛牛馬滿野及莽擾亂匈奴與之構難邊民死亡繫獲數年之間北邊虛空野有暴骨矣

**集覽** 右犁汗匈奴王之號也名咸汗音寒

獫狁 獯粥 居于北邊索隱曰唐虞以上曰山戎亦曰薰粥夏曰淳維殷曰鬼方周曰玁狁秦漢曰匈奴釜鍱鍱大口釜也音富衙尾相隨馬衙隨馬尾而行也喻車不得方軌騎不得成列

霆擊 荀子疆國篇駢然而雷擊之注駢然卒至貌言如雷震霆擊不可測也中郎

繡衣前百官表中郎秩比六百石

侍御史有繡衣直指出討姦猾

**質實**

雲中塞雲

中注見秦王政三年并州注見晉愍帝建興四年平州注見秦王政三年右北平

**書法**

夷狄之害輕書入塞重書入寇恒辭也於是殺守尉畧吏民矣其不書入

寇何莽故寇也故此書匈奴入塞下書貉人入邊壬申年兵起何盜也曷為以兵起書莽故盜也然則曷為不書起兵眾辭也與起義者微異矣匈奴貉人不書寇盜不書盜綱目之討賊嚴矣哉

**發明**

匈奴夷狄也不曰入寇而曰入塞州郡部屬也不曰盜起而曰兵起誠以



篡逆之賊人皆得而誅之故變文起義書法若此其汲汲討賊之意為何如哉故曰綱目修而亂臣賊子懼

### 莽太師王舜死

舜自莽篡後病悸寢劇死

### 莽迎龔勝為太子師友祭酒勝不食而卒

莽遣使者奉璽書印綬安車駟馬迎龔勝即拜為太子師友祭酒使者與郡縣長吏三老官屬行義諸生千人以上入里致詔使者欲令勝起迎久立門外勝稱病篤為牀室中戶

西南牖下東首加朝服拖紳使者付璽書奉印綬內安車駟馬進謂勝曰聖朝制作未定待君為政以安海內勝對曰素愚加以年老被病命在朝夕隨使君上道必死道路無益萬分使者要說至以印綬就加勝身勝輒推不受使者即上言方盛夏暑熱勝病少氣可須秋涼乃發莽許之使者為勝兩子及門人高暉等言朝廷虛心待君以茅土之封雖疾病宜動移至傳舍示有行意必為子孫遺大業暉等白之勝曰昔受漢家厚恩無以報今年老矣且暮入地誼豈以一身事二姓下見故主哉因教以棺斂喪事語畢遂不復飲食積十四日死死時七十九矣是時清名之士又有琅邪紀遂齊薛方沛唐林唐尊皆以明



經飭行顯名遠兩唐皆任莽封侯貴重莽以  
 安車迎方方因使者辭謝曰堯舜在上下有  
 巢由今明主方隆唐虞之德小臣欲守箕山  
 之節莽說其言不彊致喻麋郭欽為南郡太  
 守杜陵蔣詡為兗州刺史亦以廉直為名莽  
 居攝欽詡皆以病免官歸鄉里卧不出戶卒  
 於家沛國陳咸以律令為尚書見何武鮑宣  
 死歎曰易說見幾而作不俟終日吾可以逝  
 矣即乞骸骨去職莽篡位召咸為掌寇大夫  
 咸謝病不肯應三子參豐欽皆在位咸悉令  
 解官歸鄉里閉門不出入猶用漢家祖臘人  
 問其故咸曰我先人豈知王氏臘乎悉收歛  
 其家律令書文壁藏之又齊栗融北海禽慶  
 蘇章山陽曹竟皆儒生去官不仕於莽班固

曰王貢之材優於龔鮑守死善道勝實蹈焉  
 貞而不諛薛方近之郭欽蔣詡好遜不汗絕

紀唐 **集覽** 南牖下東首加朝服拖紳記喪大  
 矣 常居北牖北鄉陰也人君所視南面南鄉陽

也故有疾而君視之則遷向南牖下也詳見  
 論語解要說要一遙反勒也說式芮反誘之  
 也下有巢由皇甫謐曰高士傳許由字武仲  
 聞堯致天下而讓焉乃遁於潁水之陽箕山  
 之下堯又召為九州長由不欲聞之洗耳於  
 潁濱時有巢父牽犢欲飲之見由洗耳而問  
 其故由對曰堯欲召我我惡其聲是故洗耳  
 巢父曰子若處高岸深谷誰能見子子故浮  
 游欲聞求其名譽誇吾犢口遂牽犢上流飲



之箕山之節莊子堯讓天下於許由由遂遁於箕山之下正義曰箕山在洛州陽城南三十里又漢中郡襄城西北十五里有箕山漢成時鄭子真隱此王鳳備禮聘之子真不應喻麋地志扶風郡有喻麋縣漢家祖臘祖者道祭也禮夏官大馭掌馭玉路以祀及犯輶注注謂祖道輶輶磔犬也詩云取羝以輶詩家說曰將出祖道犯輶之祭也備要餞送類注共工氏之子曰脩好遠遊祀之以為祖神漢以午日祖也臘者歲終之大祭月令孟冬臘先祖注臘謂以田獵所得禽祭也高堂隆魏臺訪議曰王者各以其行盛日為祖墓日為臘水土皆盛於子墓於辰今魏以土德王天下宜以子祖辰臘如漢家以火德王火盛

於午墓於戌故以午祖戌臘說文冬至後第三戌日是王貢前漢王吉與貢禹絕紀唐矣史曰絕於紀唐遠矣注絕殊也質實一統志云龔勝彭城人安元年箕山在河南府登封縣東南三十里一名嶧嶺昔許由隱此堯召為九州長不欲聞滌耳水濱巢父牽犢上流而飲之即此上有許由墓喻麋漢之縣名屬右扶風晉省喻麋後周置汧陽郡及縣以在汧水之陽故名尋廢郡以縣屬隴州唐宋金元皆仍舊本朝因之屬鳳翔府

**書法**

莽臣皆書死賊莽也終莽之篇惟龔勝書卒所以殊之於莽臣也綱目書



不食而卒三 是年龔勝桓帝延熹元年陳龜晉穆帝永和六年辛謚

**發明** 王舜雖殞於病悸然不免書莽太師書死者篡漢之謀舜實預之且又居

其位也龔勝雖為莽所迎然持筆書不食卒者不仕篡逆能全大節歸潔其身也一

予一奪而褒貶之情見矣命義之戒嚴矣士君子出處之致昭矣

**瀕河郡蝗生** **質實** 瀕河郡漢初所置治平陰縣以瀕河山得名東漢省之故

址在開封府鄭州城西北五十里 ○河決

河決魏郡泛清河以東數郡先是莽恐河決為元城冢墓害及決東去元城不憂水故遂

不隄 **質實** 魏郡注見成帝綏和二年清和郡名注見元帝永光五年元城漢之

縣名屬魏郡曹魏因之後魏析置貴鄉縣北齊省入貴鄉隋復置治古殷城唐貞觀中又

省入貴鄉大曆初復置五代唐改興唐縣晉復為元城縣宋金因之元初省入大名縣尋

復置 本朝因之改為大名府治所仍隸焉

壬四年 春莽殺匈奴順單于登

莽邊將言虜寇皆咸子角所為故莽斬登 **集覽** 咸子角咸古犁汗王之名也其子名

角



### 定東西都及諸侯員數

莽下書以洛陽為東都常安為西都諸侯員  
 千八百附城數亦如之以俟有功諸公一同  
 有眾萬戶其餘以是為差以圖簿未定未受  
 國邑且令受奉都內月錢數千諸侯皆困乏  
 至有備

**集覽** 附城孺子嬰時當賜關內侯爵  
 作者者更名附城諸公一同諸公謂  
 諸封公者一同皆百里也受奉都內奉與俸  
 同百官表大司農屬官有都內令丞張安世  
 傳詔都內別藏張氏無

**質實** 洛陽縣名注見  
 名錢注都內主藏官也  
 安縣名注見惠  
 帝六年長安縣

### 令民得賣田

莽性躁擾不能無為每有所興造動欲慕古  
 不度時宜制度又不定吏緣為姦天下瞽瞍  
 陷刑者眾莽知民愁怨乃令民食王田者皆  
 得賣之然他政諄亂刑罰深刻賦歛重數猶  
 如故

**集覽** 吏緣為姦吏治人者  
 也芳緣而為姦欺  
 焉

### 西南夷殺牂牁大尹貉人入邊

初五威將帥出西南夷改句町王為侯王邯  
 怨怒莽諷牂牁大尹周歆詐殺邯邯弟承起  
 兵殺歆州郡擊之不能服莽又發高句驪兵  
 擊匈奴不欲行疆迫之亡出塞犯法為寇嚴



尤奏宜令州郡且尉安之今匈奴未克夫餘  
 濊貉復起此大憂也莽不聽詔尤擊之尤誘  
 高句驪侯騶至而斬焉於是貉人愈犯邊東  
 北西南皆亂莽志方盛以為四夷不足吞滅  
 專念稽古之事集覽句町注見成帝河平二年駒町  
 夷國名居遼東之東句古侯反驪與麗通力  
 之反其先出夫餘王嘗得河伯女閉於室內  
 為日所照既而有娠生一卵置煖處有一男  
 破而出及長字之曰朱蒙其俗言朱蒙者善  
 射也雖一矢殪獸甚多夫餘人謀欲殺之朱  
 蒙遂走至統骨城居焉號曰高句麗因以高  
 為氏括地志云高句麗都平壤城本漢樂浪  
 郡王險城也古朝鮮地濊貉東夷國名濊一  
 作葦音烏外烏廢二反貉通作貊莫客反趙  
 襄子破弁代以臨胡貉索隱曰貉即葦也三  
 韓之屬與高麗同種在辰漢之北高麗沃沮  
 之南朝鮮之東東窮大海皆以葦為氏正義  
 曰貊北  
 方豸種

**書法**

殺大尹叛也不書叛何莽叛者也  
故益州殺大尹止書擊天鳳四年

癸酉年 春二月太皇太后王氏崩

莽既改號太后為新室文母絕之於漢乃隳  
 壞孝元廟更為太后起廟獨置孝元廟故殿  
 以為文母寢食堂既成名曰長壽宮置酒請  
 太后既至見廟廢徹塗地驚泣曰此漢家宗



廟皆有神靈與何治而壞之且使鬼神無知  
 又何用廟為如令有知我乃人之妃妾豈宜  
 辱帝之堂以陳饋食哉私謂左右曰此人慢  
 神多矣能久得祐乎飲酒不樂而罷莽更漢  
 家黑貂著黃貂又改漢正朔伏臘曰太后令  
 其官屬黑貂至漢家正臘曰獨與其左右相  
 對飲食至是崩年八十四葬渭陵與元帝合  
 而溝絕之新室世世獻登其廟元帝配食坐  
 於牀

**集覽**

纂食堂纂與饌同說文具食也與  
 何治而壞之與去聲讀如干預之

預與何治者猶言干何事也壞音怪毀之也  
 與元帝合而溝絕之溝絕謂於兆域外溝穿  
 之欲其絕於漢也左傳定元年昭公之喪至  
 自乾侯季孫使役如闞公氏將溝焉榮駕鷲  
 諫之乃葬於墓道南孔子之為司寇也溝而  
 合諸墓注闞魯群公墓所在也公氏猶言公  
 之墓宅昭公將耐葬於闞季平子惡昭公欲  
 使役徒溝絕其兆域不使與先君同後雖不  
 為溝猶葬於先君墓道之外孔子故自昭公  
 墓外為溝使與先君墓合明臣無貶君之義  
 獻登食貨志餘三年食進業曰登再登曰平  
 餘六年食三登曰泰餘九年食然後王德流  
 洽禮樂成焉注進上

**正誤**

獻登其廟今按此  
 但謂祭獻登上其

**質實**

渭陵注見成  
 帝建始元年

**書法**

不書新室文母何不絕之於漢也成  
 新莽之篡者太后也其不絕之何其



握璽其令官屬黑貂其用漢家正鴈猶有漢氏之心焉然則其不書漢太皇太后何不成莽之為新也故以恒辭書之是故不成莽之為新則太皇太后不書漢成李氏之為唐則故后蕭氏書隋唐太宗貞觀二十二年

**發明**

莽已更號新室文母而此不書者不其改也太后雖為內主成莽之篡然實非本心特其始馬惑於莽之欺而已及夫事勢已成固已末如之何況太后之心未嘗一日忘漢此綱目所以止書太皇太后之號亦以遂其本心不絕之於漢云爾夫豈過予之哉

烏孫大小昆彌遣使入貢

莽以烏孫國人多親附小昆彌欲得烏孫心乃遣使者引小昆彌使坐大昆彌使上師友祭酒蒲昌劾奏使者曰夷狄以中國有禮誼故屈而服從大昆彌君也今序臣使於君使之上非所以有夷狄也奉使大不敬莽怒免昌官

**質實**

烏孫國名注見武帝元狩

元年

馬耆殺莽都護但欽

西域諸國以莽積失恩信馬耆先叛殺欽西域遂瓦解

**質實**

馬耆國名注見隋煬



帝大業元年

# 十一月彗星出

**書法** 間一歲而兵大起矣天道恒象信哉終綱曰書彗十有七未有無應者也

詳周顯主六年

## 匈奴烏珠留單于死烏累若鞮單于咸立

匈奴用事大臣須卜當常欲與中國和親見咸為莽所拜遂越次立之若鞮單于之號也累力追反鞮下奚反咸為莽所拜事詳見前年

**集覽** 烏累

## 戊辰天鳳元年春正月莽遣其太傅平晏之洛陽相宅

莽下詔將以是歲行巡狩禮即于土中居洛陽之都既而不行先遣晏等相宅圖起宗廟社稷郊

**集覽**

即于土中即就也書召誥王來

兆云陽天地之中四方朝貢道里均焉故曰土中社稷社所以祭后土稷所以祭穀神正義曰記祭法云王為群姓立社曰大社王自為立社曰王社然為百姓祈也祭當主於大社其稷與社共祭亦當為大社社稷焉左傳昭二十九年共工氏有子曰句龍為后土后土為社烈山氏之子曰柱為稷自夏以上祀之周棄亦為稷自商以來祀之



三月晦日食

**集覽**

日食詩註疏日食者月食之也何休云不言月者形不可

得而觀故疑言日有食之杜預曰日行遲月行疾月適及於日而與之會交會而日月同道則食月或在日道表或在日道裏則不食也又日食既注見惠帝七年又日有食詳見穀梁傳

隱三年

○莽策免其大司馬遂並

注疏

莽自即真尤備大臣有言其過失者輒拔擢孔仁等以敢擊大臣故見信任

夏四月隕霜殺草木

**書法** 武帝之世嘗書四月隕霜殺草矣於是復見而加重焉終綱目書霜四而

書四月者二詳武帝元光四年舍是無書四月隕霜者矣

○六月黃霧四塞

**書法** 終綱目書黃霧四塞二皆為王氏也五侯之封也黃霧四塞莽之將敗也

亦黃霧四塞霧惡氛也王氏蓋以是始終焉

○秋七月大風雨雹

風拔木飛北闕  
瓦雹殺牛羊

**書法** 書雹多矣未有書大風雨雹者書大風雨雹始此終綱目書雹二十四而



書大風雨雹者五是年安帝永初元年二年元初六年靈帝建寧二年

### 莽置萬國

莽以周官王制之文置卒正連率大尹州牧分六鄉六尉六隊六郊六服總為五國後歲復變更一郡至五易名而還復其故吏民不能紀每下詔書輒繫其故名云

**集覽**

卒正莽改太守曰卒正連率漢書莽改守曰連率疑守字誤必是監字率與帥同記王制十國以為連連有帥注連猶聚也帥長也率色類反六隊以南陽為前隊河內為後隊潁川為左隊弘農為右隊河東為兆隊滎陽為祈隊顏師古曰隊音遂

### 北邊大饑人相食莽與匈奴和親

匈奴求和親莽即遣使賀單于初立給言侍子登在因購求陳良終帶等單于聽命莽燒殺之會緣邊大饑人相食莽乃徵還諸將罷屯兵單于實貪莽賂遺故外不失漢家故事然內利寇掠又使遠知子登前死怨恨寇虜從左地入不絕使者問單于輒曰烏桓與匈奴黠民共為寇譬如中國有盜賊耳咸初立持國威信尚淺盡力禁止不敢有二心莽復發軍屯

**集覽**

始建國三年登來入侍四年莽斬之矣今給之曰登見存購求陳良終帶購贖也良與帶先於始建國二年降匈奴



通鑑紀事本末卷之八十一 宋孝文帝三年

五十四

**書法**

於是匈奴求和親其不書求何建武二十二年書求惡莽也故書莽與

益州蠻夷殺其大尹莽發兵擊之

**質實**

益州注見後主

建興三年 ○ 莽改錢貨法

莽復申下金銀龜貝之貨頗增減其價值而罷大小錢改作貨布貨泉二品並行每一易錢民用破業而大陷于刑

乙亥年 春民訛言黃龍死

民訛言黃龍墮死黃山宮中走觀者萬數莽捕繫之

**集覽**

黃山宮在京兆興平縣西

三十里地名槐里

**書法**

終綱曰書訛言三詳成帝建始三年舍是無書者矣

莽改匈奴單于曰恭奴善于

莽改單于號單于貪莽金幣曲聽之然寇盜如故

五原代郡兵起

**質實**

五原郡名注見明帝永平八年代郡注見楚義帝元

年

莽意以為制定則天下自平故銳思於地理制禮作樂講合六經之說公卿旦入暮出論

通鑑紀事本末

宋史紀事本末

五十五



議連年不決不暇省獄訟寃結民之急務縣宰缺者數年守兼一切貪殘日甚繡士執法在郡國者並乘權執傳相舉奏又公十分布勸農桑班時令按諸章冠蓋相望交錯道路召會吏民逮捕證左郡縣賦歛遞相賂賂白黑紛然守闕告訴者多莽自見前顯權以得漢政故務自覽眾事又好變改制度政令煩多當奉行者輒質問乃以從事前後相乘憤眊不潔莽常御燈火至明猶不能勝尚書因是為姦寢事上書待報者連年不得去拘繫郡縣者逢赦而後出衛卒不交代者至三歲姦羅常貴邊兵二十餘萬人仰衣食縣官五原代郡尤被其毒起為盜賊數千人

**集覽** 守兼

一切顏師古曰大槩曰一切謂縣中事太守兼主之按諸章按察行也諸章凡諸憲章也猶今之憲司照刷文卷證左前楊惲傳左驗明白注左子我反言在左右見此事者又唐太宗召劉洎問狀引馬周為左注左子賀反證也

**正誤** 縣官缺者數年守兼一切

貪殘日甚今按縣宰缺久不除補他官權守兼攝如毛義為安陽尉守安陽令也當於兼字句絕一切屬下句

邯鄲以北大雨水出



邯鄲縣名注見周威烈王二十三年

水深者數丈流殺數千人



丙三  
子年春二月地震

莽大司空王邑以地震乞骸骨莽不許曰天地有動有震震者有害動者不害春秋記地震易繫坤動動靜辟翕萬物生焉其好自誣飾皆此類也

**集覽**

辟翕辟通作關開也

闕

大雨雪

雪深一丈  
竹柏或枯

**書法** 三月雨雪四月雨雪記異也此二月爾何以書大雪也二月矣而雪深一

丈竹柏為枯斯可謂異矣是以書之

夏莽始賦吏祿

先是莽以制作未定上自公卿下至小吏皆不得俸祿至是始賦吏祿又曰古者歲豐則充其禮災害則有所損上計時通計天下幸無災害者太官膳羞備品即有災害以什率多少而損膳焉公卿以下各分州郡國邑保其災害亦以什率多少而損其祿中都官吏食祿者以太官膳羞備損而為節莽之制度煩碎如此課計不可理吏終不得祿各因官職為姦受取賕

**集覽**

上計奉上戶口錢穀之數若今計帳也注見漢



宣帝地節三年中都官吏謂京師諸官府也正義曰若京都府吏

**書法**

書始賦何緩也莽篡位八年矣制度未定於是始賦祿焉綱目書始賦祿

二是年莽齊甲子年魏乙卯年東魏書始命邑一壬子年周皆緩辭也

長平岸崩壅涇水莽復發兵擊匈奴

**質實**

長平岸未

詳處所或疑卽長平坂注見漢宣帝甘露二年涇水注見秦王政元年

莽群臣以岸崩上壽曰河圖所謂以土填水匈奴滅亡之祥也莽乃遣將擊匈奴至邊上屯

**書法**

書復何莽背約也既與和親矣

秋七月晦日食○冬莽大發兵擊益州蠻不克

越雋蠻亦殺其太守

**質實**

益州注見後主建興三年越雋郡名注見

武帝元鼎六年

莽兵擊蠻者疾疫死十六七賦斂民財什取伍益州虛耗而不克莽更遣將大發天水隴西騎士十萬人擊之始至頗斬首數千其後軍糧前後不相及士卒饑疫復大賦斂就都大尹馮英言今調發諸郡兵穀訾民什取其四空破梁州功終不遂宜罷兵屯田明設購



賞莽怒免英官越雋蠻夷任貴

遂殺太守枚根自立為印穀王

器穀粟訾 **正誤** 調發諸郡兵穀訾民什取其財民丁

屬下句漢書訾上有復字顏師古註發民訾財什取其四也

**莽遣五威將王駿出西域焉耆襲殺之**

莽遣駿與都護李崇出西域諸國郊迎送兵穀焉耆詐降而聚兵自備駿等至伏兵襲殺之西域

丁酉年 夏六月莽更授諸侯茅土於明堂

莽好空言慕古法多封爵人性實吝齋託以地理未定故且先賦菁茅四色之土用慰喜

封者 **集覽** 賦菁茅四色之土漢書注顏師古曰賦班也儒者以為菁菜名也茅三春

茅也莽此言以為一物則是謂菁茅為善茅也古者天子大社以五色土為壇廣五丈凡

封諸侯受天子大社之土各割其所封之方色土與之東方青南方赤西方白北方黑授

之使立社於其國燾以黃土苴以白茅黃取王者復燾四方茅取其潔錫之以茅然後得

祭使之縮酒案禹貢包匭菁茅孔氏曰菁以為菹茅以縮酒鄭氏曰茅有毛刺曰菁茅所

以供祭祀縮酒之用蔡氏曰管子云江淮之間一茅而三春名曰菁茅菁茅一物也孔氏



謂菁以為菹非是今辰州麻陽縣苞茅山出苞茅有刺而三脊括地志云苞茅山在辰州盧溪縣西南三百五十里

### 秋鑄威斗

以五石銅為之若北斗欲以厭勝衆兵司命負之出在前入在旁奇曰以五色藥石及銅為之長二尺五寸顏師古曰若作鑰石之為

**集覽** 五石銅李

**書法** 秦鑄金人不書此其書何譏愚也莽鑄威斗欲以厭勝衆兵以是為愚也

故書終綱目書鑄六是年靈帝中平三年鑄銅人後主建興十五年魏鑄銅人唐中宗嗣聖三年鑄大儀十一年鑄天樞十四年鑄九鼎皆譏也魏大像書作不與焉

### 臨淮琅邪及荊州綠林兵起

莽置羲和命士以督五均六筦皆用富賈為之乘傳求利交錯天下因與郡縣通姦百姓愈病莽復下詔申明六筦為設科禁犯者罪至死民搖手觸禁不得耕桑繇役煩劇而旱蝗相仍獄訟不決吏旁緣莽禁侵刻小民富者不自保貧者無以自存於是並起為盜賊依阻山澤吏不能禽而覆蔽之浸淫日廣臨淮瓜田儀等依阻會稽長州琅邪呂母聚黨數千人殺海曲宰入海中為盜其衆浸多至萬數荊州饑饉民衆入野澤掘鳧茨而食之



更相侵奪新市人王匡王鳳為評理諍訟遂推為渠帥眾數百人諸亡命者馬武王常成等皆往從之藏於綠林山中數月間至七八千人又南郡江夏眾皆萬人莽遣使者赦之還言盜解復合問其故皆曰愁法禁煩苛不得舉手力作所得不足以給貢稅閉門自守又坐鄰伍鑄錢挾銅姦吏因以愁民民窮悉起為盜賊莽大怒免之或言民驕黠當誅及言時運適然且滅

**集覽** 六筦筦與管同漢書字作幹亦通用謂主領也莽設六筦之令命縣官酤酒賣鹽鐵器鑄錢諸采取名山大澤眾物者稅之吏旁緣莽禁吏依旁因緣莽之禁制而為侵刻臨淮郡名徐州之域南臨淮水今泗州是瓜

地名今瓜州渡是在江都縣南四十里江之濱本楊子江中之沙磧也與京口西津渡對境長州州本作洲秦置會稽郡長洲縣隸焉今平江府長洲縣琅邪呂母琅邪郡徐州之域後漢為琅邪國唐改沂州今屬益都呂母姓名琅邪人鳧茨鳧音符茨本作菀音才支反爾雅芍鳧菀也注鳧菀生下田苗

**正誤** 臨似龍須而細根如指頭黑色可食

瓜田儀等今按瓜非地

**質實** 一統志云臨淮名服虔云姓瓜田名儀

漢之郡名治盱眙縣晉改為盱眙郡南齊於此置北兗州陳屬北譙州唐屬楚州宋置盱眙軍後仍為縣紹定中改招信軍元陞招信路尋改臨淮府後仍為盱眙縣屬泗州

本朝因之屬鳳陽



府會稽郡名注見景帝三年越國長洲本吳之苑名漢為吳縣地自晉至隋皆因之唐萬歲通天初析置長洲縣乾元間置長洲軍大曆間復為縣宋元仍舊本朝因之屬蘇州府琅邪郡名注見光武建武五年海曲漢之縣名屬琅邪郡舊設鹽官名日照鎮魏晉以來俱屬莒縣金始置日照縣屬莒州元仍舊本朝因之屬青州府荆州注見獻帝建安十二年野澤未詳處所新市地名注見地黃三年馬武南陽湖陽人王常潁川舞陽人綠林山注見地皇二年南郡注見獻帝建安十二年江夏郡名注見獻帝建安十三年

戊寅年春北軍南門災○莽以費與為荆州牧未

### 行免

莽以興為荆州牧見問到部方畧興對曰荆揚之民率依阻山澤以漁采為業間者國張六筭稅山澤妨奪民之利連年久旱百姓饑窮故為盜賊興到部欲令明曉告盜賊歸田里假貸犁牛種食開其租賦冀可以解釋安集莽怒免興官

**書法**

自己已改諸官名至是始書牧終莽之身書牧者再費興田况皆賢而不

果用者也為三州民惜之故書

莽考吏致富者收其財以給軍

**考異**

按統系例注曰篡賊



事亦連書但每歲首及有異事一加其名此上文已書莽以費興為荊州牧此句上莽字疑羨吏以不得俸祿並為姦利郡尹縣宰家累千金莽乃考諸軍吏及緣邊吏為姦利增產致富者收其家所有財產五分之四以助邊急開吏告其將奴婢告其主冀以禁姦而姦愈甚

### 莽孫宗自殺

宋自畫容貌被服天子衣冠發覺自殺

### 莽大夫楊雄死

成帝之世雄以奏賦為郎給事黃門與莽及劉秀並列哀帝之初又與董賢同官莽賢為

三公權傾人主所薦莫不拔擢而雄三世不徙官及莽篡位雄以耆老久次轉為大夫活於執利好古樂道欲以文章成名於後世乃作太玄法言用心於內不求於外人皆忽之唯劉秀及范滂敬焉而桓譚以為絕倫鉅鹿侯芭師事焉劉棻嘗從雄學作奇字及棻坐事誅辭連及雄時雄校書天祿閣上使者來欲收之雄恐不能自免乃從閣上自投下幾死莽聞之以雄不知情詔勿問然雄所作法言卒章盛稱莽功德可比伊尹周公後又作劇秦美新之文以頌莽君子病焉

**集覽** 三世歷仕哀平孺子嬰耆老久次賀楊云耆至也言至老境也久次謂久在位次未得改除太玄法言揚雄以為經莫大於易故作



太玄傳莫大於論語故作法言侯芭鉅鹿人芭音葩劇秦美新劇奇逆反戲劇也美稱美也

**正誤**

揚雄三世不徙官今按雄自成帝時奏賦為郎給事黃門三世正謂成帝

哀帝平帝也及王莽篡位乃以耆老久次轉為大夫不數孺子嬰也劇秦美新之文今按文選載揚子雲劇秦美新文篇內歷叙上古三代而曰獨秦屈起西戎云云三世而亡何其劇歟注云劇甚也題曰劇秦美新蓋以秦王無道為甚而美新莽之德也

**質實**

桓譚沛國相人鉅鹿郡名注見靈帝中平元年

**書法**

莽臣皆書死賊之也莽大夫多矣特書揚雄所以深病雄也終綱目卒書

死者莽臣之外前范增後胡僧不空而已

**發明**

所貴乎士君子者以其審於出處之際明於去就之義者也武王行大義

平殘賊舉天下莫或非之伯夷叔齊乃獨奮然耻其所為不食周粟而死若二子者豈好死而惡生哉誠以君臣天地之大義亘古今而不可泯故寧死而不屈爾自世道堙微士君子不明於大節故有忍耻蒙垢仕非其地者其間亦或身處下僚自以為託迹吏隱祿以代耕借是以文其說抑不知辭尊居卑辭富居貧在昏庸之世猶或可以自解至於篡逆之人烏可一日處其位哉楊雄在哀平間固嘗出任於朝與



董賢王莽輩比肩並列當其權勢熏灼雄  
不苟於附媚安於恬退誠足佳尚者洎莽  
篡國之後雄以前朝舊人不於此時亟引  
而退與龔勝薛方郎欽蔣詡諸賢並驅爭  
先乃復貪戀爵祿嗚呼忍不去雖位非通顯  
然亦既立其朝而臣事之矣莽以斗筭穿  
窬之才身負殺逆文姦飾偽盜竊漢祚士  
君子稍有人心者必羞見其面目安有拜  
伏於前為之臣子受其爵食其祿而不知  
愧耻者哉雄以一身事二姓大節已虧况  
於稱莽功德與夫劇秦美新等作又君子  
之所病者故宜直筆深貶之也或者顧謂  
雄家素貧苟不仕莽朝何以自給豈知士  
君子當安於命義不當以苟活為心誠使  
遁迹丘園饑餓而歿既能不辱其身所獲  
多矣昔程頤子有言饑餓死最輕失節事  
最大觀綱目所書莽大夫楊雄死則雄之  
失身於莽盡東海之波不足以湔其耻矣  
士君子之立身至此豈不  
深可歎哉豈不深可惜哉

### 琅邪樊崇東海刁子都等兵皆起

琅邪樊崇起兵於莒眾百餘人群盜以崇猛  
勇皆附之一歲間至萬餘人逢安徐宣謝祿  
楊音各起兵合數萬人從崇轉掠青徐間又  
有東海刁子都亦起兵鈔擊徐兗莽遣使者  
發兵擊之不能克

**集覽**

刁子都刁立日貂姓出渤海齊大夫取刁之後

**質實**

莒縣名注



見獻帝建安二年東海郡名注見秦二世二年

烏累單于死弟呼都而尸迫臯若鞮單于輿立

**考異**

此句上漏匈奴二字

巳六  
卯年

春莽立須卜當為單于大募兵擊匈奴

莽遣王歙誘當將至長安立為須卜單于大司馬嚴尤曰當在右部單于動靜輒語中國此方面大助也今迎置長安藁街一胡人耳莽不聽而匈奴寇邊益甚莽乃大募天下丁男及死罪囚吏民奴一切稅天下吏民皆三十取一欲以擊匈奴輔立當令公卿以下至


郡縣黃綬皆保養軍馬以秩為差又傳募有奇技術可以攻匈奴者或言能度冰不用舟楫連馬接騎濟百萬師或言不持斗糧服食藥物三軍不饑或言能飛一日千里可窺匈奴莽輒試之知其不可用苟欲獲其名皆拜為理軍賜以車馬待發嚴尤諫曰匈奴可且以為後先憂山東盜賊莽大怒策免尤大司空史范升奏記司空王邑曰朝以遠者不服為至念升以近者不悅為重憂今動與時戾事與道反馳驚覆車之轍踵循敗事之後後出益可怪晚發愈可懼耳方春歲首而動發遠役藜藿不充田荒不耕穀價騰踊斛至數千吏民陷於湯火之中非國家之民也如此則胡貊守闕青徐之寇在於帷帳矣升有一



言可以解天下倒懸免元元之急不可書傳願蒙引見極陳所懷邑不聽去聲說示之藁街注見元帝建昭四年黃綬百官表大夫博士御史謁者郎秩比二百石以上皆銅印黃綬正義曰綬所以貫佩玉相承受者也以秩為差隨祿秩之高下養軍多少也差楚宜反參差不齊也禮記其祿以是為差注差音初佳反非也大司空史史官屬也范升為大司空史藜藿藜草名即今落帚也或謂落藜初生可食藿豆葉也正義曰藜似藿而表赤史記糲梁之食藜藿之羹

### 關東饑旱

時饑旱連年乃子都等黨眾寢多至六七萬



### 資治通鑑綱目卷之八



通鑑綱目卷之八十八 親孝此皇元

綱目卷之八十八

綱目卷之八十八  
親孝此皇元



